

"Help!": un zûc une vore seri

Un video zûc al insegne cemût
socori i disabili in câs di emergjence

Il Laboratori di interazion uomo-macchina de Universitât di Udin (Hci Lab) al à ideât e fat, cun fin di istruzion e adestrament, un inovatîf video zûc che al consint di sperimentâ lis propriis abilitâts intal judâ lis personis disabili in situazions di emergjence.

"Help!", chest il non dal video zûc che al è de categorie dai serious game, al è stât metût a pont in

colaborazion cu la Consulte regionâl des associazions dai disabili dal Friûl Vignesie Julie. La aplicazion e je di-



sponibile a gratis su Facebook ae direzion www.facebook.com/Help-TheSeriousGame.

"I serious game – al sclaris il diretôr dal Laboratori di interazion om-machine, Luca Chittaro – a son il strument plui resint e inovatîf pe formazion, in ambits che a spaziin dal militâr al aziendâl, ma il nestri al è l'unic serious game tal mont dedicât aes emergjencis che a cjapin personis disabili. Cun di plui, nol è risiervât a un public di specialiscj e al pues jessi doprât cun bon profit di cualsisedi utent Facebook".

Intai varis nivei dal video zûc disponibii cumò, l'utent si cjate devant di avigniments tant che un ta-

ramot o un fûc cul obietîf di judâ un disabil in cjadree a rudielis inte evacuazion di un edifici. Il nivel iniziâl al è une palestre di adestrament che, sot de vuide di une Vuardie dal fûc virtuâl, e permet di imparâ lis nozions necessariis pal otigniment dal obietîf. Lis liniis vuide insegnadis si basin su chês uficiâls raccomandadis da Vuardiis dal fûc. I nivei futûrs dal serious game a calcolaran ancje altris gjenars di disabilitât e di emergjencis.

"Ogni di lis personis costretis

suntune cjadree a rudielis a àn di frontâ ostacui insprietâts – al aferme il rapresentant de Consulte regionâl des associazions dai disabili, Mauro Morassut – e chest videozûc realizât dal Ateneu furlan al ufris la pussibilitât di imparâ in mût semplic, ma zovevul, cemût condusi une persone in carocine e passâ i scjalins. Cun di plui, viodude la sô alte valence sociâl, al podarès jessi impleât in maniere utile intes scuclis par sensibilizâ i zovins viers la disabilitât".